



Regional
Housing
Programme

RSP BILTEN

DECEMBAR 2017.





Završene zgrade u Ovči,
Beograd, Srbija,
decembar 2017.



Završene zgrade u Koniku,
Podgorica, Crna Gora,
decembar 2017.

Poruke predstavnika partnerskih zemalja



Ministrica Semiha Borovac

Zahvaljujući Regionalnom stambenom programu, u BiH je do sada izgrađeno 435 stambenih jedinica, dok je završetak još 1.200 planiran za narednu godinu. Slobodno možemo reći da je ovaj program u našoj zemlji doživio ogroman zamah, što su prepoznali i donatori, koji su na nedavnom sastanku u Parizu odlučili da osiguraju i dodatnih 3,1 miliona eura za njegov nastavak. U predstojećem periodu očekuje se izgradnja novih stambenih jedinica. Planirano je da se u 2019. izgradi 294, a u 2020. godini dodatnih 550 stambenih jedinica za porodice izbjeglih i raseljenih lica. Veoma je bitno da ovaj program prate mjere održivosti povratka, jer sâm krov nad glavom nije garancija uspješnosti povratka, a to je naš primarni cilj. Ministarstvo za ljudska prava i izbjeglice BiH radi na tome da osigura dodatna finansijska sredstva za poboljšanje kvaliteta života povratnika u vidu bolje komunalne i društvene infrastrukture, stvaranja uslova za zapošljavanje i privređivanje, obrazovanje i socijalnu zaštitu, u čemu ključnu ulogu imaju lokalne zajednice.



Državni sekretar Nikola Mažar

Republika Hrvatska je tokom 2017. godine nastavila sprovođenje projekata u okviru Regionalnog stambenog programa. U tom smislu, uspješno smo završili tri projekta: Dom za starija i lica s invaliditetom u Glini za 75 korisnika, izgradnju dvije stambene zgrade u Kninu za 40 porodica i stambene zgrade u Benkovcu za 21 porodicu. Projekat „Kupovina 101 stana“ nalazi se u završnoj fazi i preostalo je da se kupe još četiri stana. Težište je sada prebačeno na sprovođenje projekta „Organizovano renoviranje, rekonstrukcija i izgradnja 62 kuće“. Središnji državni ured za obnovu i stambeno zbrinjavanje u potpunosti je posvećen nastavku sprovođenja RSP-a i u narednim godinama kroz nove projekte koje su u pripremljivoj fazi, sve dok i posljednji korisnik ne bude stambeno zbrinut.



Ministar Kemal Purišić

Na kraju 2017. godine, s izuzetnim zadovoljstvom mogu konstatovati da je Crna Gora još jednom ostvarila zavidne rezultate u implementaciji Regionalnog stambenog programa. Svakako smo najponosniji na završetak izgradnje 120 stambenih jedinica na kampu Konik i useljenje preko 670 lica u nove stanove. Zatvaranje ovog najvećeg izbjegličkog naselja u Crnoj Gori, planirano za ljeto 2018. godine nakon završetka izgradnje dodatne 51 stambene jedinice, imat će nemjerljiv efekat ne samo na život ovog ugroženog stanovništva, već i na urbanizaciju čitavog jednog dijela grada Podgorice. U toku 2017. godine završena je i izgradnja Doma za stara lica u Pljevljima, u kojem se smještaj prvih korisnika očekuje početkom 2018. godine i koji će zapošljavati 36 osoba. Ovaj projekat imat će višestruke koristi za cjelokupan sistem socijalne zaštite u Crnoj Gori. Pored toga, u Beranama je u toku izgradnja 94 stana za ugrožene izbeglice iz kolektivnog naselja „Rudeš“, čiji se završetak planira za sredinu 2018. godine. Još nekoliko drugih projekata je u toku ili u fazi pripreme, koji će u narednih nekoliko godina obezbijediti dostojanstven život velikom broju najugroženijih porodica.



Komesar Vladimir Cucić

Regionalni stambeni program u Srbiji u fazi je pune implementacije. Ova godina je bila naročito značajna zato što smo završili izgradnju 235 stanova za izbjeglice u beogradskom naselju Ovča i otvorili više od 20 gradilišta za stanove, među njima i ono najveće, za izgradnju 270 stanova u zemunskom naselju Kamendin. Komesarijat za izbjeglice i migracije nastavit će jednakim intenzitetom i posvećenošću da realizuje Regionalni stambeni program u Srbiji sa željom da stambeno zbrine sve one ugrožene izbjegličke porodice u Srbiji koje još nemaju svoj krov nad glavom.





Ključni događaji u 2017. godini



Na 11 gradilišta završena izgradnja 632 stana:

Knin (40 stanova), Glina (75) i Benkovac (21), **Hrvatska**; Pale FBiH (6), Foča FBiH - Ustikolina (9), Tuzla (20), Bosanski Petrovac (20) i Ilidža (18), **Bosna i Hercegovina**; Konik (120) i Pljevlja (68), **Crna Gora** i Ovča (235), **Srbija**

Na 41 gradilištu započeta izgradnja 1.128 stambenih jedinica:

Berane (94) i Konik (dodatna 51 SJ), **Crna Gora**; 18 općina (326) i Kamendin (270), **Srbija** i 20 općina sa 387 stanova, **Bosna i Hercegovina**

319 seoskih kuća kupljeno širom Srbije

255 paketa građevinskog materijala dodijeljeno u Srbiji i Bosni i Hercegovini

287 kuća rekonstruisano u Bosni i Hercegovini


109 montažnih kuća dodijeljeno širom Srbije

Dodatnih 9 stanova kupljeno širom Hrvatske

**BLIZU 2.800 PORODICA
STAMBENO ZBRINUTO
KRAJEM 2017.**

Na kraju 2017. godine, RSP je obezbijedio blizu 2.600 stambenih rješenja za RSP korisnike. Očekuje se da će dinamika isporuke dostići svoj maksimum tokom 2018. godine, kada je planiran završetak više od 3.500 dodatnih stambenih rješenja. U nastavku je dat prikaz do sada obezbjeđenog broja stambenih jedinica po stambenom modelu i po državama.

STAMBENE JEDINICE ZAVRŠENE DO SREDINE DECEMBRA 2017.



STATUS PROVOĐENJA RSP-a – KLJUČNE BROJKE (ZAKLJUČNO S DECEMBROM 2017.)

Broj odobrenih projekata	24
Procijenjena ukupna vrijednost odobrenih projekata	217 miliona eura
Ukupan iznos odobrenih bespovratnih sredstava	183 miliona eura
Ukupno nacionalno učešće	34 miliona eura
Broj obuhvaćenih domaćinstava	9.500
Broj obuhvaćenih korisnika	28.000
Ukupno isplaćen iznos	85 miliona eura
Dodijeljeno stambenih jedinica	2.600



Najvažnija postignuća u 2017.



BOSNA I HERCEGOVINA



Bosna i Hercegovina je tokom 2017. godine ostvarila dobar napredak u pogledu isporuke stambenih jedinica kroz četiri projekta čije je provođenje trenutno u toku. Krajem 2017. godine završena je izgradnja/rekonstrukcija gotovo 300 uništenih i oštećenih kuća za porodice povratnika i interno raseljenih lica. Pored toga, korisnicima su dodijeljena 73 stana u prvim zgradama čiju je izgradnju finansirao RSP u Pale FBiH-Prači, Foča FBiH-Ustikolini, Tuzli, Bosanskom Petrovcu i Ilidži. Također, tokom prve polovine 2017. godine u 20 općina širom zemlje započeta je izgradnja stambenih zgrada u okviru projekta BiH3, čiji se završetak očekuje u drugoj polovini 2018. godine. Uskoro se, također, očekuje i završetak procesa odabira korisnika za odobreni projekat BiH5, koji uključuje obezbjeđivanje dodatnih 550 stambenih jedinica, a početak njegovog provođenja planiran je za 2018. godinu. Trenutno je u pripremi i novi pod-projekat (BiH6).

Do sada je završeno blizu 500 stambenih jedinica, dok je tokom 2018. godine planirana dodjela preko 1.000 domova u okviru RSP-a u Bosni i Hercegovini. Projekti koji su trenutno u toku, do kraja 2020. godine treba da omoguće dodjelu 2.500 trajnih i održivih stambenih rješenja u korist oko 9.000 ugroženih porodica.



CRNA GORA



U Crnoj Gori su 2017. godine uspješno završeni radovi na izgradnji 12 zgrada u podgoričkom kampu Konik. Ove zgrade sada obezbjeđuju domove za 120 najugroženijih porodica, koje su proteklih 20 godina provele u šatorima i kontejnerima.

Pored toga, zahvaljujući uštedama u okviru prvobitnog projekta, za stanovnike kampa Konik i okoline bit će izgrađen 51 dodatni stan, čime se broj korisničkih porodica povećava na 171. Radovi na izgradnji doma za starija i lica s invaliditetom u Pljevljima završeni su u novembru, a svih 68 stanara moći će da se useli čim to vremenski uslovi budu dozvolili. U Beranama su u februaru 2017. godine započeti građevinski radovi kojima će se do kraja 2018. godine stambeno zbrinuti 271 osoba u 94 stana.

Naredne godine planirana je kupovina 36 stana za odabrane korisnike iz Herceg Novog, kao i izgradnja 50 pojedinačnih kuća u različitim općinama, čime će ukupan broj RSP stambenih rješenja dodijeljenih u Crnoj Gori iznositi blizu 500.



REPUBLIKA HRVATSKA



U Hrvatskoj su tokom 2017. godine uspješno završeni radovi na tri gradilišta. Dvije stambene zgrade sa 40 stanova izgrađene su u Kninu, a novi stanari uselili su se početkom oktobra 2017. godine. U Glini su završeni radovi na rekonstrukciji doma za 75 starijih i osoba s invaliditetom, a zgrada je predata Sisačko-moslavinskoj županiji u julu 2017. godine. Odabranih 75 stanara useliti će se početkom 2018. godine, nakon selekcije 30 budućih zaposlenih. Izgradnja stambene zgrade za 21 porodicu u Benkovcu također je završena, a stanari će moći da se usele u januaru 2018. godine.

Pored navednog, 2017. godine je u okviru projekta HR4 kupljeno dodatnih devet stanova, a sve u cilju kupovine stanova za najmanje 101 korisničko domaćinstvo. Do kraja 2017. godine, 262 stambene jedinice obezbjeđene su RSP korisnicima u Hrvatskoj, dok je za 2018. godinu planirana dodjela još 66.



REPUBLIKA SRBIJA



Srbija je tokom 2017. godine nastavila da ostvaruje značajan napredak u obezbjeđivanju RSP stambenih rješenja, posebno u pogledu kupovine seoskih kuća, izgradnje montažnih kuća i dodjele paketa građevinskog materijala. Krajem 2017. godine, završena je dodjela i postavljanje 109 montažnih i 319 seoskih kuća. U decembru su privedeni kraju radovi na izgradnji 235 stanova u beogradskom naselju Ovča. U glavnom gradu Srbije, tačnije u Kamendinu (općina Zemun), iste godine otvoreno je još jedno gradilište gdje će smještaj biti obezbjeđen za 270 korisničkih porodica.

Pored toga, započeti su i važni građevinski projekti u 18 različitih općina širom zemlje u cilju obezbjeđivanja ukupno 381 stambene jedinice. U Srbiji je za 2018. godinu planirana dodjela više od 2.000 stambenih rješenja, gotovo 1.000 paketa građevinskog materijala, preko 500 novoizgrađenih stanova i oko 500 montažnih i seoskih kuća.



Upoznajte korisnike RSP-a



BOSNA I HERCEGOVINA

Mirsad i Namira Ramović su tokom perioda od 1992. do 1996. godine bili raseljeni u Garaždu, Jablanici i Sarajevu. Ova porodica prošla je kroz traumatičan period kada je njihov sin Benjamin imao dvije kliničke smrti na rođenju. Greškom ljekara, Benjamin je ostao devedesetoprocentni invalid, dijete s posebnim potrebama, koje ne čuje i ne govori. Ovaj nesretni događaj odredio je sudbinu porodice Ramović. Blizina bolnice i svakodnevna medicinska njega učinili su da sve do 2013. godine ostanu u Sarajevu, gdje su živjeli u iznajmljenom stanu. Protekle četiri godine živjeli su u oronuloj kući u Ustikolini, gdje je vjetar puhao sa svih strana, pa im je svake godine trebalo mnogo drva da bi izdržali zimu.

Novi stan u zgradi izgrađenju u okviru Regionalnog stambenog programa u Ustikolini, spas je za ovu porodicu, budući da su uslovi za život daleko bolji u odnosu na prethodne. Briga o Benjaminu i dalje oduzima mnogo vremena njegovim roditeljima, koji ga tri puta sedmično vode kod logopeda, defektologa i psihijatra u Foču i Goražde, ali postoji mogućnost da Benjamin progovori i da za dvije ili tri godine krene u školu. Ujedno, njihova dvanaestogodišnja godišnja kćerka Amila sada može da se posveti školi, s obzirom da je izuzetna učenica s odličnim ocjenama. Bez obzira na mnoge životne nedaće, na Namirinom i Benjaminovom licu je osmijeh i istinska želja za novim životom u boljim uslovima zahvaljujući RSP-u.

Glavne aktivnosti

URUČENJE KLJUČEVA KORISNICIMA U PRVIM VIŠESTAMBENIM ZGRADAMA ČIJU JE IZGRADNJU U BIH FINANSIRAO RSP



U Ustikolini, općina Foča FBiH, Bosna i Hercegovina, 31. oktobra 2017. godine organizovan je događaj kojim je obilježen uspješan završetak izgradnje devet stanova za izbjeglice i raseljena lica u okviru RSP **projekta BiH3**.

Još jedan događaj u okviru istog projekta organizovan je 7. decembra 2017. godine u Tuzli (BiH), na kojem su uručeni ključevi novih domova za 20 RSP korisničkih porodica. Projekat BiH3 obuhvata izgradnju ukupno 512 stanova u 19 općina širom zemlje, uključujući i Brčko distrikt. Ovaj projekat napreduje dobro: tokom 2017. godine očekuje se završetak 73 stana, dok se za 2018. godinu predviđa završetak 399, a preostalih 40 stanova 2019. godine.



NASTAVLJENO URUČENJE KLJUČEVA RSP POVRAĆNICIMA U BOSNI I HERCEGOVINI



U Bosni i Hercegovini je 10. februara 2017. godine održana ceremonija u Derventi, kojom je obilježena primopredaja ključeva za 24 korisničke porodice. Odabrani korisnici su povratnici iz Hrvatske, koji će se sada useliti u svoje predratne kuće obnovljene u okviru RSP **projekta BiH1**.

Vrijednost projekta čiji se završetak očekuje 2018. godine iznosi 2,7 miliona eura.



Upoznajte korisnike RSP-a



REPUBLIKA HRVATSKA

Janko (68) i Slavka (65) Ivanišević su sa svoje dvoje djece 1995. godine iz Knina u Hrvatskoj izbjegli u Suboticu u Srbiji, gdje su smještaj pronašli u jednom od bungalova u nekadašnjem ljetnom odmaralištu nadomak jezera Palić pretvorenom u kolektivni centar. Ivaniševići su se iz izbjeglištva vratili 1999. godine u svoju staru kuću u okolini Knina, ponovo izgrađenu na ruševinama uništene porodične kuće, koja je 2006. godine postala neadekvatna za stanovanje, zbog čega su morali da se presele u vikendicu Slavkine sestre koja živi u inostranstvu.

Janko prima skromnu penziju koju je zaradio radeći na željeznici prije rata. Slavka je penzionisana i mjesečno prima 160 eura. Njihov sin Aleksandar, koji sa svojom suprugom i dvoje djece živi u istom domaćinstvu, povremeno je zaposlen i trenutno radi kao vozač u jednoj radnji za prodaju namještaja. Njihova ćerka Mirjana radi kao čistačica u bolnici u Kninu i ima troje djece.

Ivaniševići su zahvaljujući RSP-u konačno uspjeli da dobiju stan u novoizgrađenoj zgradi u Kninu, u koju su se uselili u oktobru 2017. godine.



Glavne aktivnosti



KORISNICIMA U KNINU PREDATO 40 STANOVA

Središnji državni ured za obnovu i stambeno zbrinjavanje (SDUOSZ) organizovao je 4. oktobra 2017. godine događaj kojim je obilježen završetak izgradnje stanova za 40 RSP korisničkih porodica u dvije stambene zgrade. Korisnici su prethodno u drugim državama regiona živjeli u kolektivnom smještaju ili generalno u lošim životnim uslovima. Ukupna vrijednost RSP **projekta HR2** – izgradnja dvije stambene zgrade sa po 20 stanova – iznosi 3,5 miliona eura, od čega se 75% (2,6 miliona eura) finansira iz RSP Fonda, a 25% predstavlja nacionalno učešće.



DOM ZA STARIJA I LICA S INVALIDITETOM U GLINI PREDAT NA UPOTREBU

Župan Sisačko-moslavačke županije Ivo Žinić i državni sekretar Središnjeg ureda za rekonstrukciju i stambeno zbrinjavanje Nikola Mažar potpisali su 5. jula 2017. godine Ugovor o pravima i obavezama za korištenje Doma za starija i lica s invaliditetom u Glini u okviru RSP **projekta HR3**, čime je obilježena svečana primopredaja Doma. Ukupna vrijednost rekonstrukcije i proširenja objekta iznosi 4,3 miliona eura. Osnivač Doma u Glini je Sisačko-moslavinska županija, dok je Državni ured za rekonstrukciju i stambeno zbrinjavanje bio zadužen za njegovu izgradnju i opremanje, kao i za odabir korisnika. Otvaranje Doma za korisnike očekuje se početkom 2018. godine, nakon završetka procesa selekcije 30 zaposlenih.



Upoznajte korisnike RSP-a



CRNA GORA

Šemsija Gaši (28) je 1999. godine sa svojim roditeljima došla iz Đakovice i iskusila sve uslove života u Kampu: najprije su živeli u platnenim šatorima, a zatim u malim drvenim barakama koje su sagradili. U ljeto 2012. godine, u velikom požaru izgorjeli su svi šatori i barake, ostavivši stanare Kampa bez ičega. Zahvaljujući brznoj reakciji Vlade Crne Gore, UNHCR-a, CEB-a i ostalih partnera, odmah su obezbijeđeni privremeni šatori koji su ubrzo zatim zamijenjeni kontejnerima s priključcima za vodu i struju, frižiderima, šporetima i osnovnim namještajem.

Šemsija ima trinaestogodišnjeg sina koji ide u školu organizovanim prevozom iz Kampa. Prevoz do gradskih škola svakodnevno organizuje Ministarstvo rada i socijalnog staranja Crne Gore za svu djecu iz Kampa, čime je procenat djece koja napuštaju školu sveden na minimum. Šemsija redovno učestvuje na ženskim radionicama u organizaciji Crvenog krsta, u okviru kojih Romkinje imaju priliku da razgovaraju i potraže rješenja za izazove s kojima se suočavaju u svakodnevnom životu. Takođe se organizuju i edukativne radionice o zdravstvenim i socijalnim pitanjima s visokim procentom posjećenosti među stanovnicima Kampa, čime se doprinosi prilagođavanju stanovnika Kampa svakodnevnom urbanom životu.

Šemsija i njen sin uselili su se u novi stan čiju je izgradnju u jednoj od 12 novoizgrađenih zgrada finansirao RSP. Osmijeh na njihovim licima govori u prilog tome koliko su zahvalni za šansu da započnu život u boljim uslovima.



Glavne aktivnosti

U NOVE DOMOVE USELILO SE 120 PORODICA IZ KAMPA KONIK U CRNOJ GORI



U Koniku je 15. novembra 2017. godine organizovana ceremonija primopredaje stanova čiju je izgradnju finansirao RSP za 120 najugroženijih porodica iz kampa Konik. Izgradnju ovih 120 stanova predatih na upotrebu finansirao je RSP, kao i dodatni 51 stan koji će korisnicima biti dodijeljen u jesen 2018. godine. Ovaj RSP projekat (**MNE2**) nadovezuje se na prethodnu aktivnost koju je Evropska komisija finansirala kroz IPA fondove, kada je 48 stanova dodijeljeno ugroženim stanovnicima Konika u jesen 2015. godine. Zajedno sa stanovima finansiranim preko IPA fondova, RSP projekat treba da doprinese definitivnom zatvaranju naselja Konik krajem 2018. godine.



POLOŽEN KAMEN TEMELJAC ZA IZGRADNJU 94 STAMBENE JEDINICE U BERANAMA



Ministar rada i socijalnog staranja Kemal Purišić, gradonačelnik Berana Dragoslav Ščekić i predstavnica ambasade SAD u Crnoj Gori Lesli Freriksen, položili su 7. aprila 2017. godine kamen temeljac za izgradnju 94 stambene jedinice za smještaj raseljenih lica u Beranama.

Ukupna vrijednost **projekta MNE4** procjenjuje se na 4 miliona eura, od čega će se 3,6 miliona eura finansirati od sredstava iz RSP fonda.

U decembru 2016. godine potpisan je ugovor s izvođačem radova, čiji je završetak predviđen za drugu polovinu 2018. godine.



Upoznajte korisnike RSP-a



REPUBLIKA SRBIJA

Milena Tintor imala je 13 godina kada je zajedno s roditeljima i dva mlađa brata izbjegla iz hrvatskog sela Varivode blizu Knina. Sa sobom su ponijeli samo foto-albume, a sve što posjeduju ostavili su u velikoj porodičnoj kući okruženoj plodnom zemljom koju je porodica obrađivala decenijama unazad.

Milenina majka Dušanka bila je knjigovođa, a njen suprug novinar, i kako je Milena sa suzama u očima nekoliko puta ponovila, vodili su veoma ugodan i sretan život u Hrvatskoj sve dok nije počeo rat. Nakon dolaska u Srbiju, privremeno su se smjestili u malu kuću Dušankine rođake. Budući da je kuća bila u veoma lošem stanju, odselili su se i počeli da žive kao podstanari svuda po Beogradu i beogradskim naseljima, u sve gorim i gorim uslovima. Milenin otac Jovan pisao je za nekoliko izbjegličkih časopisa, a majka Dušanka uspjela je da pronađe posao u jednoj knjigovodstvenoj agenciji. Njihovo troje djece prošlo je kroz nekoliko teških godina dok se nisu navikli na novo gradsko okruženje u kojem su ih djeca iz škole ismijavala zbog različitog akcenta i zbog toga što nisu imali novac za knjige i garderobu.

Dušanka i Jovan uspjeli su da kupe plac u beogradskom predgrađu Krnjača i 2003. godine počeli da grade kuću uz pomoć svojih rođaka i kredita. Dušanka, Jovan i Milena sa svoje troje djece još uvijek žive u toj kući. Tri puta su se prijavljivali za dobijanje paketa građevinskog materijala, ali su svaki put odbijeni. Konačno, kada je Dušanka saznala za mogućnost dobijanja stana u Ovči, ubijedila je svoju ćerku da još jednom pokuša. Milena kaže da uopšte nije vjerovala da je to moguće. Čak i kada je dobila potvrdu da joj je prijava prihvaćena, ni tada nije vjerovala da će konačno imati sopstveni stan za sebe i svoje troje djece.

Milena i njena djeca su se u decembru 2017. godine uselili u novi stan čiju je izgradnju finansirao RSP u jednoj od novoizgrađenih zgrada u Ovči.

Glavne aktivnosti

ZAPOČETA IZGRADNJA 270 STANOVA U KAMENDINU



Polaganje kamena temeljca za izgradnju 270 stanova u beogradskom naselju Kamendin obilježeno je 17. novembra 2017. godine događajem u organizaciji Komesarijata za izbjeglice i migracije Republike Srbije. Ovaj projekat, čiji je cilj stambeno zbrinjavanje 1.712 ugroženih RSP korisničkih porodica u Srbiji, dio je projekta SRB5, koji je u novembru 2014. godine odobrila Skupština donatora RSP fonda. U 27 općina širom Srbije planirana je izgradnja do 1.262 nova stana ukupne vrijednosti 46,8 miliona eura, od čega će 10,4 miliona eura biti obezbijedeno kroz nacionalno učešće. Pored toga, projekat SRB5 uključuje i dodjelu 200 paketa građevinskog materijala i kupovinu 241 seoske kuće. Završetak radova u Kamendinu planiran je za početak 2019. godine, kada će se useliti korisnici – izbjeglice iz Hrvatske i Bosne i Hercegovine. Odabir korisnika za dodjelu ovih stanova trenutno je u toku, a primljeno je blizu 2.000 zahtjeva.

KORISNIČKIM PORODICAMA IZ SRBIJE URUČENI KLJUČEVI MONTAŽNIH KUĆA I UGOVORI O DODJELI PAKETA GRAĐEVINSKOG MATERIJALA

U Beogradu je 1. septembra uručeno 302 ugovora o dodjeli paketa građevinskog materijala porodicama koje su izbjegle iz Bosne i Hercegovine i Hrvatske i žive na na teritoriji grada Beograda. Dodjela je započeta u oktobru 2017. godine, a završetak izgradnje očekuje se do jula 2018. godine. Ova 302 stambena rješenja predstavljaju dio trećeg RSP projekta u Srbiji (SRB3). Ukupna vrijednost projekta kojim će se obezbijediti trajno stambeno rješenje za oko 700 porodica na teritoriji grada Beograda, iznosi 13,6 miliona eura. U okviru ovog projekta prethodno je već kupljeno 69 seoskih kuća, dok je ove godine obezbijedeno još 235 stambenih jedinica nakon završetka izgradnje stanova u beogradskom naselju Ovča.



U NEKOLIKO GRADOVA U SRBIJI ZAPOČETA IZGRADNJA STAMBENIH ZGRADA

Tokom marta 2017. godine, Komesarijat za izbjeglice i migracije Republike Srbije organizovao je tri događaja – u Sremskoj Mitrovici, Kruševcu i Prokuplju – kojima je obilježen početak radova na izgradnji stambenih zgrada za stambeno zbrinjavanje 40 izbjegličkih porodica u Sremskoj Mitrovici, odnosno po 20 u Kruševcu i Prokuplju. Ukupna vrijednost svakog od navedenih projekata procjenjuje se na 700, 450 i 400 hiljada eura, a planirano je da radovi na izgradnji budu završeni u roku od godinu dana. Pored ove tri, u provođenju **projekta SRB2** učestvuje ukupno devet općina u Srbiji. U preostalim šest općina – Paraćinu, Vršcu, Bajinoj Bašti, Šapcu, Kikindi i Šidu – s radovima na izgradnji još 200 stanova krenut će se početkom 2018. godine.





Unaprijeđena regionalna saradnja

RSP je ojačao susjedске odnose i podstakao partnerske zemlje na saradnju i izgradnju međusobnog povjerenja



ministrica Semiha Borovac

Za najboljeg ministra u Savjetu ministara Bosne i Hercegovine od strane "Nezavisnih novina" proglašena je Semiha Borovac, ministrica ljudskih prava i izbjeglica.

"Posebno sam ganuta jer je ovo priznanje podrška čitalaca, građana BiH. Ovo nije priznanje samo meni, već cijelom Vijeću ministara. Ovdje sam kako bih izrazila priznanje medijima i novinarama i njihovoj časnoj profesiji. Svima u BiH nam je potrebno više dijaloga, razumijevanja, poštovanja i samokritičkog preispitivanja vlastitih stavova. Sigurna sam da u svima vama koji slijedite ovaj put imamo jake partnere u borbi za izgradnju sigurnije budućnosti za našu djecu".

Ministrica za ljudska prava i izbjeglice Bosne i Hercegovine g-đa Semiha Borovac, u svom obraćanju na 11. sastanku Upravnog odbora RSP-a održanom u Parizu, 29. novembra 2017. godine, prenijela je zajedničko saopćenje Bosne i Hercegovine, Hrvatske, Crne Gore i Srbije, u kojem se još jednom potvrđuje nastavak posvećenosti ovih zemalja RSP-u. Partnerske zemlje su u saopćenju istakle da je u svojstvu programa rekonstrukcije nakon sukoba, RSP jedinstven program i u regionalnim i u svjetskim okvirima. Pored toga, RSP također ostvaruje i značajan doprinos u pogledu rješavanja pitanja smanjenja siromaštva, socijalne inkluzije i ekonomskog osnaživanja, kao i pružanja podrške Bosni i Hercegovini, Crnoj Gori i Srbiji u procesu pristupanja EU.

Na osnovu principa Sarajevskog procesa i Zajedničke deklaracije koje su potpisali ministri vanjskih poslova Bosne i Hercegovine, Crne Gore, Republike Hrvatske i Republike Srbije, mi, predstavnici vodećih institucija četiri partnerske zemlje uključene u provođenje Regionalnog stambenog programa (RSP), ovim putem ponovo potvrđujemo svoju posvećenost i predanost obezbjeđivanju pune političke, finansijske, pravne, socijalne i drugih vidova podrške neophodne za okončanje dugotrajne raseljenosti nastale usljed sukoba u regionu tokom devedesetih godina prošlog vijeka.

Kako je u nekoliko navrata istaknuto, RSP i na regionalnom i na globalnom nivou predstavlja jedinstven program rekonstrukcije nakon sukoba. Pokrenut je kao dio šireg političkog sporazuma i predstavlja inicijativu zasnovanu na partnerstvu između naše četiri zemlje. Saradnja između naših zemalja doprinijela je obnovi međusobnog povjerenja, regionalnoj stabilnosti, promociji mira i koegzistencije u regionu, a što je još važnije, dala je konkretne rezultate.

Program je do danas obezbijedio trajna stambena rješenja za 2.160 najugroženijih korisničkih porodica, što ne bi bilo moguće bez svesrdne podrške donatora na čelu s Evropskom unijom. Željeli bismo da iskoristimo ovu priliku i izrazimo svoju zahvalnost svim RSP donatorima za njihovo povjerenje i podršku, koja je partnerskim zemljama omogućila da rade zajedno na izgradnji domova i bolje budućnosti onima kojima je to najpotrebnije. Saradnja između četiri partnerske zemlje koje su radile zajedno na iznalaženju i provođenju rješenja, pokazala se vitalnom za uspjeh RSP-a. Ovim putem, željeli bismo da istaknemo značaj održavanja i daljeg unaprjeđenja regionalnog karaktera programa.

Posvetili smo se obezbjeđivanju trajnih i održivih stambenih rješenja za najugroženije izbjeglice i raseljena lica. Što je najvažnije, također prepoznavamo i to da se ugroženim korisničkim porodicama mora obezbijediti pristup komunalnim uslugama, ekonomskim mogućnostima i socijalnim pravima u cilju obezbjeđivanja njihove trajne i održive (re)integracije. U tom smislu, revidirali smo procjenu potreba za održiv povratak, izradili planove održivosti i identifikovali mjere djelovanja kako bi se olakšala (re)integracija RSP korisnika u njihove lokalne zajednice. Obezbijedili smo nacionalno učešće i također unaprijedili i svoje implementacione kapacitete.

Svi mi imamo veliku odgovornost prema korisnicima programa. Njihova budućnost u velikoj mjeri zavisi od našeg rada i nastavka posvećenosti RSP-u.

Pariz, 29. novembar 2017. godine

Vidljivost RSP-a

IZLOŽBA U EU INFO CENTRU, BEOGRAD

Početak januara 2017. godine, organizovana je foto izložba na kojoj je prikazano 60 fotografija i predstavljeni rezultati dva stambena projekta za izbjeglice, „Regionalnog stambenog programa“ i „Podrške Evropske unije za unaprjeđenje životnih uslova prisilnih migranata“.

KRATKI FILMOVI O RSP KORISNICIMA

U martu 2017. godine završeni su novi kratki filmovi o korisnicima iz četiri partnerske zemlje: porodica Gondžić uselila se u svoju novoizgrađenu kuću u mjestu Olovo u Bosni i Hercegovini. Ilinka Knežević iz Knina u Hrvatskoj dobila je stan finansiran sredstvima RSP-a. Draga Vujović se sa svojim sinom uselila u novi stan u Nikšiću u Crnoj Gori. Nenad Tumara dobio je novu montažnu kuću u Pećincima u Srbiji.

INTERVJU U NEDELJNIKU

Ambasador EU u Srbiji Majkl Davenport i komesar za izbjeglice i migracije Republike Srbije Vladimir Cucić dali su intervju za izdanje srpskog časopisa „Nedeljnik“ od 14. februara 2017. godine. Integralna verzija intervjua na engleskom jeziku dostupna je na RSP internet stranici. [Pročitajte članak](#)

DNEVNE NOVINE "OSLOBOĐENJE" O RSP-U

Početak mjeseca oktobra, u dnevnim novinama "Oslobođenje", objavljen je tekst o napretku RSP-a u BiH. Predstavljeni su dosadašnji rezultati, te je naglašena izuzetna važnost jednog ovakvog projekta kako za povratnike, tako i za stabilnost u cijeloj regiji.

KONFERENCIJA ZA NOVINARE

Komesarijat za izbjeglice i migracije Republike Srbije (KIRS) i Razvojna banka Savjeta Evrope održali su 28. februara 2017. godine u Novom Sadu konferenciju za novinare u cilju predstavljanja najnovijih rezultata Regionalnog stambenog programa. Konferencija za novinare organizovana je u kontekstu godišnjeg sastanka povjerenika KIRS-a, koja je ove godine bila posvećena provođenju RSP-a u Srbiji.

RSP na HRVATSKOJ NACIONALNOJ TELEVIZIJI

Gosti TV emisije pod nazivom „Prizma“ emitovane u junu 2017. godine bili su g-din Ivica Preskar ispred vodeće institucije RSP u Hrvatskoj – Državnog ureda za obnovu i stambeno zbrinjavanje i g-din Neven Crvenković iz UNHCR-a, koji su predstavili rezultate RSP-a i prikazali nekoliko inserata iz posljednjeg filma o provođenju RSP-a u Hrvatskoj.

[Pogledajte snimak emisije](#)

ČLANAK O RSP-U U „DEUTSCHE WELLE“

Novinar medijske kuće Deutsche Welle posjetio je Beograd u junu 2017. godine i u kontekstu sastanaka Skupštine donatora/Upravnog odbora pratio rad učesnika u sprovođenju RSP-a, nakon čega je o RSP-u objavljen članak na internet prezentaciji ove medijske kuće na srpskom, engleskom i njemačkom jeziku. [Pročitajte članak](#)

RSP na TV N1

Predstavnici RSP partnerskih zemalja gostovali su 14. februara u emisiji na regionalnom TV kanalu N1. Njihovom zajedničkom porukom istaknut je pozitivan uticaj koji RSP ostvaruje na regionalnu saradnju između zemalja. [Pogledajte snimak emisije](#)



Tokom cijele godine organizuje se veliki broj promotivnih događaja povodom zvaničnih i ceremonija uručenja ključeva i početka radova u sve četiri partnerske zemlje, kako bi se RSP promovisao na regionalnom nivou i šire.

U cilju jačanja odnosa s lokalnim i regionalnim medijima, u proljeće 2018. godine planiran je regionalni medijski karavan, koji će biti organizovan u bliskoj saradnji s partnerskim zemljama, SEV-om, UNHCR-om i OEBS-om, kao i donatorskom zajednicom.

Cilj karavana je predstavljanje RSP aktivnosti i rezultata u sve četiri partnerske zemlje medijima u regionu kroz posjete RSP korisnicima, upoznavanje s različitim stambenim modelima, intervju s nacionalnim koordinatorima i drugim učesnicima u programu i sl.



RSP sastanci



Jedanaesti po redu sastanak Upravnog odbora Regionalnog stambenog programa i petnaesti sastanak Skupštine donatora RSP fonda održan je 29. novembra u Parizu.



Organi upravljanja RSP-a sastali su se u cilju davanja osvrta na napredak RSP-a i razgovora o budućim prioritetima. Sa gotovo 3.000 ugroženih porodica stambeno zbrinutih na kraju 2017. godine, učesnici u RSP-u zajednički su izrazili svoje zadovoljstvo trenutnim napretkom i uticajem koji program ostvaruje na regionalno pomirenje na Zapadnom Balkanu.

U znak prepoznavanja napretka, Norveška i Njemačka najavile su da će u RSP fond namijeniti nova sredstva: Norveška će izdvojiti dodatnih 15 miliona norveških kruna (oko 1,5 miliona eura), dok će Njemačka obezbijediti još 1,5 milion eura. Ova sredstva nadovezuju se na namjeru Evropske unije da 2017. godine dodijeli dodatnih 44,8 miliona eura za RSP i treću donaciju SAD-a iz septembra 2017. godine u iznosu od 10 miliona dolara.

Skupština donatora jednoglasno je izabrala Sjedinjene Američke Države kao kopredsjedavajućeg Skupštine donatora RSP fonda i Upravnog odbora za 2018. godinu. [Pročitajte članak](#)

Ključne brojke (zaključno s 1. decembrom 2017. godine):

Namijenjeno za RSP: 284 miliona eura

Dodijeljeno za RSP fond: 171 milion eura

Odobreno bespovratnih sredstava: 183 miliona eura

Isplaćeno bespovratnih sredstava: 85 miliona eura

Novi doprinosi donatora

Izvjestan broj donatora je tokom 2017. godine namijenio nova sredstva za RSP fond, u znak priznanja napretka postignutog proteklih godina. Evropska unija najavila je da će do kraja godine dodijeliti dodatnih 45 miliona eura. Sjedinjene Američke Države u septembru su dale svoju treću donaciju u iznosu od 10 miliona eura. Norveška je u decembru izdvojila dodatnih 15 miliona norveških kruna (oko 1,5 miliona eura), dok će Njemačka do kraja godine obezbijediti još 1,5 milion eura.

SREDSTVA KOJA SU DODIJELILI DONATORI 284 miliona eura



G-din Kolin Volf,

šef sektora za regionalnu saradnju i programe na Zapadnom Balkanu u okviru Direktorijata EU za proširenje pri Evropskoj komisiji:

“Socijalni, pomirujući i regionalni karakter RSP-a prikazuje osnovne principe Evropske unije. Sada kada je tempo provođenja solidan, neophodno je usmjeriti napore ka obezbjeđivanju trajnosti rezultata.”



G-đa Nensi Ajris,

zamjenica direktora Kancelarije za Evropu, Centralnu Aziju i Ameriku u okviru Biroa za stanovništvo, izbjeglice i migracije (PRM/ECA) Državnog sekretarijata SAD:

“RSP predstavlja snažan primjer regionalnog pomirenja. Sjedinjene Američke Države su programu doprinijele s ukupno 30 miliona dolara. Pored toga, Sjedinjene Američke Države planiraju da nastave s davanjem doprinosa dopunskim mjerama kojima se unaprijeđuju životni uslovi i ekonomska održivost za RSP korisnike.”



G-din Georg Hagl,

šef Kancelarije za Zapadni Balkan pri Saveznom ministarstvu inostranih poslova Njemačke:

“Njemačka je bila i nastaviti će da bude posvećena RSP-u. Našom dodatnom donacijom od 1,5 miliona eura RSP fondu ističe se ova posvećenost i uvažavaju dosadašnji impresivni rezultati.”



G-din Olav Rajnertsen,

viši savjetnik u Kancelariji za evropske poslove pri Ministarstvu vanjskih poslova Norveške:

“Zadovoljstvo mi je da najavim nova sredstva za RSP fond u iznosu od 1,5 miliona eura od Norveške, kao znak povjerenja Norveške u program i zahvalnosti za skorašnji dobar napredak.”



RSP tim



G-din Erik Svin pridružio se Regionalnom stambenom projektu na funkciji predstavnika Vlade Sjedinjenih Američkih Država. G-din Svin zaposlen je u Kancelariji za Evropu, Centralnu Aziju i Ameriku u okviru Biroa za stanovništvo, izbjeglice i migracije (PRM) Državnog sekretarijata SAD. Član je tima koji izrađuje i upravlja odgovorom Vlade Sjedinjenih Američkih Država na izbjeglička i migracijska pitanja na evropskom kontinentu. Konkretno, g-din Svin je vodeći oficir za pomenuta pitanja za teritoriju Zapadnog Balkana.

U tom svojstvu, on nadgleda i prati finansijski doprinos Vlade Sjedinjenih Država RSP-u, dodatnu podršku za održivost programa kojom upravljaju NVO, kao i podršku Vlade Sjedinjenih Američkih Država operacijama UNHCR-a, MKCK-a i MOM-a u Evropi. G-din Svin je diplomatski službenik Državnog sekretarijata SAD, a prethodno je funkciju obavljao u Moskvi, Rusiji i Čenaju u Indiji.

G-din Svin dolazi na poziciju g-dina Džerija Kalarikala, čiji doprinos RSP-u izuzetno cijene svi učesnici u provođenju programa.

Planovi za 2018. godinu



Godina 2018. biće još jedna značajna godina za RSP, budući da se očekuje završetak više od 3.500 stambenih jedinica i njihova dodjela kvalifikovanim korisnicima u četiri partnerske zemlje, između ostalog:

- Izgradnja/rekonstrukcija preko 700 kuća širom Bosne i Hercegovine;
- Izgradnja 400 stanova u različitim općinama u Bosni i Hercegovini;
- Dodjela blizu 1.000 paketa građevinskog materijala i kupovina 370 seoskih kuća širom Srbije;
- Izgradnja 270 stanova u beogradskom naselju Kamendin i blizu 200 stanova u drugim općinama u Srbiji;
- Izgradnja 121 montažne kuće u Srbiji;
- Kupovina 170 stanova u Srbiji, Crnoj Gori i Hrvatskoj;
- Izgradnja stanova za 51 korisnika u Koniku, Podgorica i za 94 korisnika u Beranama, Crna Gora
- Rekonstrukcija 62 kuće u Hrvatskoj;
- Izgradnja 50 kuća u Crnoj Gori.

Partnerske zemlje su na osnovu preostalih i najavljenih novih sredstava koja će u RSP fond biti dodijeljena u 2018. godini, pozvane da početkom godine podnesu prijave za dobijanje bespovratnih sredstava u okviru novih projekata.



Bosna i
Hercegovina



Hrvatska



Crna Gora



Srbija

Regionalni stambeni program finansira i podržava međunarodna zajednica



Regionalni stambeni program (RSP) ima za cilj da obezbijedi trajna rješenja za stambeno zbrinjavanje raseljenih lica nastalih nakon sukoba na teritoriji bivše Jugoslavije u periodu od 1991-1995. godine. RSP sprovode Bosna i Hercegovina, Hrvatska, Crna Gora i Srbija, a finansira najvećim dijelom međunarodna donatorska zajednica. Glavni donator je Evropska unija. Ostali donatori su Sjedinjene Američke Države, Njemačka, Norveška, Italija, Švajcarska, Danska, Turska, Luksemburg, Kipar, Republika Češka, Mađarska, Rumunija, Republika Slovačka.

www.regionalhousingprogramme.org